

燕

閒

四

適

燕閒四適卷之十三

西甌孫丕顯編輯

潭陽王基校閱

畫

論畫

畫力可五百年至八百年而神去千年絕矣書力可八百年至千年而神去千二百

年絕矣

書法故有時代魏晉尚矣六朝之不及魏晉猶宋元之不及六朝與唐也畫則不然若魏晉若六朝若唐若宋若元人物山水花鳥各自成佛作祖不以時代為限

夏文彥論畫三品曰氣韻生動出於天成人莫窺其
巧者謂之神品筆墨超絕傳染得宜意趣有餘者謂
之妙品得其形似而不失規矩者謂之能品

按張彥遠之論畫曰失於自然而後神失於神而後
妙失於妙而後精精之爲病也而成謹細自然者爲
上品之上神者爲上品之中妙者爲上品之下精者
爲中品之上謹細者爲中品之中宋鄧椿云自昔鑒
賞家分品有三曰神曰妙曰能獨唐朱景真謨唐賢
畫錄三品之外更增逸品其後王復休作益州名畫
記乃以逸爲先而神妙能次之景真雖云逸格不拘

常法用表賢愚然逸之高豈得附於三品之末未若
復休首推之爲當也其意亦似祖述彥遠愚竊謂彥
遠之論大約好奇未甚循理夫畫至於神而能事盡
矣豈有不自然者乎若有毫髮不自然則非神矣至
於逸品自應置三品之外豈可居神品之表但不當
與妙能議優劣耳宋大小米元高倪雲山眉山竹石
足以當逸品

畫家稱顧陸張吳猶書之有鍾張羲獻也後又稱曹
衛顧陸則書之鍾皇張索耳按其初議亦不盡爾謝
赫畫品以一品五人而陸探微居第一其語曰窮理

盡性事絕言象包前孕後古今獨立非復激揚所能
稱贊但價重之極乎上上品之外無它寄言故屈標
第一等曹不興第二曰不興之跡殆無復傳唯秘閣
之內一龍而已觀其風骨名豈虛成衛協第三曰占
畫之略至協始精六法之中殆爲兼善雖不該備形
跡頗得壯氣凌跨群雄曠代絕筆至顧愷之則列之
三品之二曰骨體精微筆無妄下但跡不逮意聲過
其實李嗣真續畫品則以陸探微居上品中第一張
僧繇上品下第二衛協中品上第一曹不興中品上
第四顧凱之中品上第五而所進又多不可曉姚最

列齊陳以下畫人而張僧繇居第七然姚又云顧公之美獨擅往策荀衛曹張方之蔑然如負日月以得神明慨抱玉之徒勤悲曲高而絕唱分庭抗禮未見其人謝云聲過其實可爲於邑張懷瓘云顧公運思精微襟靈莫測雖寄迹翰墨其神氣飄然在烟霄之上不可以圖畫間求象人之美張得其肉陸得其骨顧得其神神妙亡方以顧爲最喻之書則顧陸比之鍾張僧繇比之逸少俱爲古今之獨絕豈可以品第拘謝氏黜顧未爲定鑒張彥遠則云顧愷之之迹緊勁聯綿循環超忽調格逸易風移電疾意存筆先筆

盡意在所以全神氣也陸探微精利潤媚新奇妙絕
名高宋代時無等倫張僧繇點曳斫拂依衛夫人筆
陣圖一點一畫別是一功鉤戟利劍森然吳道玄
古今獨步前不見顧陸後無來者人假天造英靈不
窮衆皆密於盼際我則離披其點畫衆皆謹於象似
我則脫落其凡俗彎弧挺刃直柱構梁不假界筆直
尺風鬚雲鬚數尺飛動毛根出肉力健有餘數仞之
畫或自臂起或從足先巨壯詭恠膚脉連結過於僧
繇矣由此言之典刑當首虎頭精神故推道子衛協
調古探微功新可謂四聖不與跡猶隱顯僧繇等方

殆庶比之於書殆猶金索之倫耳

謝赫集懷之而列三品之二李嗣真第愷之而列中品上之第五姚最列齊陳以下人而張僧繇第七朱景玄錄唐朝名畫而遺曹霸不得從二王之後劉道醇著畫繼而巨擘僅居能品著五代名畫補遺而韓求李和張圖朱瑤之人物竝居神品宋之王瓘王霽孫夢卿趙光輔高益武宗元亦如之人固有幸有不幸也賴其久而後定耳王瓘一時賞譽騰踔似可繼吳生而遺跡永絕良可浩歎

張彥遠歷代名畫記可謂詳備矣諸葛武侯父子右

軍大令世所不知將毋以功業書名掩之乎彥遠云
上古之畫跡簡意澹而雅正顧陸之流是也中古之
畫細密精緻而臻麗展鄭之流是也近代之畫粲爛
而求備今人之畫錯亂而無旨衆工之迹是也又云
顧陸以降畫跡鮮有美悉言之唯觀吳道玄之迹可
謂六法俱全萬象必盡神人假手窮極造化也推尊
可謂至矣然宣和畫譜載道玄畫極多皆神佛像士
女不過十之一二山水遂絕響矣

郭若虛有云佛道人物士女牛馬近不及古山水林
石花竹禽魚古不及近何以明之顧愷之陸探微張

僧繇吳道元及閻立德立本皆純重雅正性出天然
吳生之作爲萬世法號曰畫聖張萱周昉韓幹戴嵩
氣韻骨法皆出意表後之學者終不能到故曰近不
及古如李成關仝范寬黃筌之跡徐熙黃筌居家宋之
蹤前不藉師資後無復繼踵者借使二李三王之輩
復起邊鸞陳庶之倫再生亦將何以措手其間哉故
曰古不及近此語亦定論也然人物以吳生爲聖山
水以營丘爲神由此推之則仲宋當推伯時元初必
讓子昂蓋二君雖不敢凌吳蹈李而能兼撮二家之
長故也

人物自顧陸展鄭以至僧繇道玄一變也山水大小
李一變也荆關董巨又一變也李成范寬又一變也
劉李馬夏又一變也大癡黃筌又一變也趙子昂近
宋人人物爲勝沈啓南近元人山水爲尤二子之於
古可謂具體而微大小米高彥敬以簡略取韻倪瓚
以雅弱取姿宜登逸品米是當家

花鳥以徐熙爲神黃筌爲妙居宋次之宣和帝又次
之沈啓南淺色水墨實出自徐熙而更加簡淡神彩
若新至於道復漸無色矣

彥遠云古之嬾臂纖而胸束則自周昉而後小變矣

古之馬喙尖而腹細則自韓幹而後小變矣又云古
畫山水或水不容汎或人大於山專在顯其所長而
不守於俗變又沈存中云書畫之妙當以神會難可
以形求也家有摩詰雪中芭蕉此乃得心應手意
到便成故造理入神迥得天意

皆四部稿

高子曰畫家六法三病六要六長之說此爲初學入
門訣也以之論畫而畫斯下矣余所論畫以天趣人
趣物趣取之天趣者神是也人趣者生是也物趣者
形似是也夫神在形似之外而形在神氣之中形不
生動其失則板生外形似其失則踈故求神氣於形

似之外取生意於形似之中生神取自遠望爲天趣也形似得於近觀爲人趣也故圖畫張挂以遠望之山川徒具峻削而無烟巒之潤林樹徒作層疊而無搖動之風人物徒肖尸居壁立而無語言顧盼步履轉折之容花鳥徒具羽毛文彩顏色錦簇而無若飛若鳴若香若濕之想皆謂之無神四者無可指摘玩之儼然形具此謂得物趣也能以人趣中求其神氣生意運動則天趣始得具足如唐人之畫余所見吳道子水月觀音大幅描法粧束設色精采寶珠纓絡搖動梵容半體上籠白紗袍衫隱隱若輕綃遮蔽復

加白粉細錦緣邊無論後世即五代宋室去唐未遠
余所見諸天菩薩之像何能一筆可倣其滿幅一月
月光若黃若白中坐大士上下俱水鵲首以望恍若
萬水滂湃人月動搖所謂神生畫外者此也又若閻
立本六國圖其模寫形容肖諸醜類狀其醉醒歌舞
之容異服野處之態種種神生得自化外又見閻大
幅四王圖其君臣俯仰威儀侍從朝拱端肅珍奇羅
列種種生輝山樹槎枒層層烟潤色求形似而望若
堆疊以指摩之則薄平絹素又如李思訓驪山阿房
宮圖山崖萬疊臺閣千重重騎樓船人物雲集悉以

分寸爲工宛若蟻聚逶迤遠近遊覽儀形無不纖備
要知畫者神具心胷而生自指腕一點一抹天趣具
足故能肖百里於方寸圖萬態於毫端松杉歷亂峰
石嶙峋且皴染岩壑數層勾勒樹葉萬種 又如

周昉美人圖美在意外丰度隱然含嬌歛媚姿態端
莊非彼容冶輕盈使人視之艷想目亂又如周之白
描過海羅漢龍王請齋卷子細若遊絲回還無跡其
像之睛若點漆作狀疑生老儼龍踵少似飛動海濤
洶湧展卷神驚水族騎鯨過目心駭豈直徒具形骸

點染紙墨云哉又見邊鸞花草昆蟲花若搖風裊娜
作態蟲疑吸露飛舞翩然草之偃亞風動逼似天成
雖對雪展圖此身若坐春和園囿又如戴嵩雨中歸
牧一圖上作線柳數株絲絲烟起以墨洒細點狀如
針頭儼若一天暮靄靈雨霏霏豎子跨牛奔歸意急
此皆神生狀外生具形中天趣飛動者也故唐人之
畫爲萬世法然唐人之畫莊重律嚴不求工巧而自
多妙處思所不及後人之畫克意工巧而物趣悉到
殊乏唐人天趣混成若彼丘文播楊寧韋道豐僧貫
休闡立德第立本周昉吳道玄韓求李祝朱瑤輩此

爲人物神手模擬逼真生神妙足設色白描各臻至
極其山水如李思訓子昭道盧鴻王摩詰荆浩胡翼
張僧繇關同輩筆力遒勁立意高遠山環水蟠樹烟
巒靄墨汁淋漓神氣生旺花鳥如鍾隱郭權輝施璘
邊鸞杜霄李述黃筌子居采皆設色類生展布有法
花之容冶露滴鳥之掀翥風生此皆權奪化工春歸
掌握者也又如韓幹之馬戴嵩張符之牛僧傳古之
龍韓太尉之虎袁義之魚皆極一時獨技生意奔逸
氣運騫騰神迫蠢動之外雖臨摹未能彷彿若宋之
孫知微僧月蓬周文矩李遵梁楷馬和之僧梵隆蘇

漢臣顏次平徐世榮盛師顏李早李伯時顧闳中皆
工於人物而得其丰神精爽者也如郭忠恕許道寧
米友仁趙千里郭熙李唐高克明孫可元劉松年李
嵩馬遠馬逵夏珪樓觀胡瓘朱懷瑾范寬董源王晉
卿陳珏朱銳王廷筠李成張舜民此皆工於山水得
其泉石高風者也如楊補之丁野堂李迪李安忠吳
炳毛松毛益李永年崔白馬永忠單邦顯陳可久僧
希白劉興祖徐世昌徐榮趙昌趙大年王凝馬麟此
皆工於花鳥得其天機活潑者也若宋高宗之山水
竹石文湖州蘇長公毛信卿吳心玉之竹石枯木圖

士安之野景樹石張浮休之烟村此皆天籟動於筆
鋒渭川波入硯沼揮洒萬竿雲蒸霧變真之高齋綠
陰滿堂清風四座豈彼俗工可容措手又如陳所翁
之龍錢光甫之魚朱紹宗劉宗古之猫犬皆得一物
骨氣運動狀其形似名擅一時余自唐人畫中賞其
神具畫前故畫成神足而宋則工於求似故畫足神
微宋人物趣迥邁于唐而唐之天趣則遠過於宋也
今之評畫者以宋人爲院畫不以爲重獨尚元畫以
宋巧太過而神不足也然而宋人之畫亦非後人可
造堂堂而元人之畫敢爲竝駕馳驅且元之黃大痴

豈非夏李源流而王叔明亦用董范家法錢舜舉黃
筌之變色盛子昭乃劉松年之遺派趙松雪則天分
高朗心胷不凡摘取馬和之李公麟之描法而得劉
松年李營丘之結構其設色則祖趙伯駒李嵩之濃
淡得宜而生意則法夏珪馬遠之高曠宏遠及其成
功而全不類此數輩自出一種溫潤清雅之態見之
如見美人無不動色此故迥絕一代爲士林名畫然
皆法古絕無邪筆元畫如王黃二趙子昂倪瓚之士
氣陳仲仁曹知白王若水高克恭顧正之柯九思錢
逸吳仲圭李息齋姚雪窗王元章蕭月潭高士安張

叔厚丁野夫之雅致而畫之精工如王振朋陳仲美
顏秋月沈秋澗劉耀卿孫君澤胡廷輝臧祥卿邊魯
生張可觀而閑逸如張子政蘇大年顧定之姚雪心
輩皆元之名家足以擅名當代則可謂之能過於宋
則不可也其松雪大痴叔明宋人見之亦能甘心服
其天趣今之論畫必曰士氣所謂士氣者乃士林中
能作隸家畫品全用神氣生動爲法不求物趣以得
天趣爲高觀其曰寫而不曰描者欲脫畫工院氣故
耳此等謂之寄興取玩一世則可若云善畫何以比
方前代而爲後世寶藏若趙松雪王叔明黃子久錢

舜舉輩此真士氣畫也而四君可能淺近效否是果無宋人家法而泛然爲一代之雄哉例此可以知畫矣

畫病

張彥遠云吳道子畫仲由便戴木劍閭令公畫昭君已著幃帽殊不知木劍創於晉代幃帽興於國朝舉此凡例亦畫之一病也且如幅巾傳於漢魏羃籬起自齊隋幃頭始於周朝巾子創於武德胡服靴衫豈可輒施於古像衣冠組綬不宜長用於今人芒屨非塞北所宜牛車非嶺南所有詳辨古今之物商較土

風之宜指事繪形可驗時代其或長生南朝不見北
朝人物習熟塞北不識江南山川遊處江東不知京
洛之盛此則非繪畫之病也按此段語大有意畫者
不可不知

郭若虛因之云漢魏以前始戴幅巾晉宋之世方
用幘籬後周以三尺皁絹向後幘髮名折上巾通
謂之幘頭武帝時裁成四角後魏隋朝貴臣黃綾
袍烏紗帽九環帶六合靴次用桐木黑漆爲巾子
裹於幘頭內前繫二脚後垂二脚貴賤服之唐太
宗嘗服翼善冠貴臣服進賢冠至則天朝以絲葛

爲幘頭巾子以賜百官開元間始易以羅又別賜
供服官內臣圓頭官幘巾子唐末用漆紗裹之乃
今幘頭也三代皆衣襴衫秦始皇時以紫緋綠袍
爲三等服庶人以白此未爲定據唐高宗以後百官紫
服金玉帶深淺緋服金帶綠服銀帶青服鍮石帶
庶人黃銅鐵帶五品以上佩魚後爲龜尋復爲魚
又文官一品以下帶手中筭袋刀子礪石睿宗朝
武官五品以上帶七事跣蹠開元初罷之晉處士
馮翼衣布大袖周緣以皁下加襴前繫二長帶隋
唐朝野服之三代以前皆跣足後人始服木屐伊

尹爲草履秦世參用絲革鞞唐代宗朝凡在宮人
左右者紅錦鞞鞞此郭若虛論畫衣冠異制也彼
謂三代以前皆跣足非也冠履之制詳自軒轅何
言跣也古冠而不幘漢元壯髮以幘蒙之王莽頂
禿始加其屋袁紹始製纁巾魏武裁爲帛袂林宗
折角文若成岐南渡永明改纁爲帽白帟練布盛
自王承相以後小冠博衣彌於晉末晉氏放曠施
屐賓筵然有露卯陰卯之異婦人髻紛不一元康
以後盛以五兵爲飾束髮旣緩至被於額卮言別
錄已詳著之如若虛所論極多挂漏畫家不可不

審也今世畫人主卽翼善冠黃袍玉束帶無撻尾
涓人則今衫帽貴官戴漢冠餘士大夫戴唐巾不
復論時代也豈直漢光東封觀者有僧梁武郊祀
從官乘馬而已哉

凡三代兩漢皆用馬車魏晉至梁陳皆用牛車元
魏君臣有乘馬及牛車者唐雖人主妃后非乘馬
卽步輦自郊祀之外不乘車也

畫價

張彥遠云書畫道殊不可混詰書卽約字以言價畫
則無涯以定名况漢魏三國名踪已絕於代今人貴

耳賤目罕能詳鑒若傳授不昧其物猶存則爲有國
有家之重寶晉之顧宋之陸梁之張首尾完全爲希
代之珍皆不可論價如其偶獲方寸便可槭持比之
書價則顧陸可同鍾張僧繇可同逸少書則逡巡可
成畫非歲月可就所以書多於畫自古而然今分爲
三古以定貴賤以漢三國爲上古則趙岐劉褒蔡邕
張衡後漢諸葛亮蜀漢曹髦楊修桓範徐邈魏曹不興吳
之流是也以晉宋爲中古則明帝荀勗衛協王廙顧
愷之謝稚嵇康戴逵晉陸探微顧寶光袁情顧景秀
宋之流是也以齊梁北齊後魏陳後周爲下古則姚

曇度謝赫劉瑱毛惠遠齊元帝袁昂張僧繇江僧寶

梁楊子華田僧亮劉殺鬼曹仲達北齊蔣少游楊乞德

魏顧野王陳馮提伽後周之流是也隋及國初為近代

之價則董伯仁展子虔孫尚子鄭法士楊契丹陳善

見隋張孝師范長壽尉遲乙僧王知慎閻立德閻立

本唐之流是也上古質略徒有其名畫之踪跡不可

具見中古妍質相參世之所重如顧陸之跡人間切

要下古評量科簡稍易辯解迹涉今時之人所悅其

間有中古可齊上古顧陸是也下古可齊中古僧繇

子華是也近代之價可齊下古董展楊鄭是也國朝

畫可齊中古則尉遲乙僧吳道玄閻立本是也若銓
量次第有數百等今且舉俗之所知而言凡人間藏
蓄必當有顧陸張吳著名卷軸方可言有圖畫若言
有書籍豈可無九經三史顧陸張吳爲正經楊鄭董
展爲三史其諸雜迹爲百家吳雖近可爲正經必也手揣卷
軸口定貴賤不惜泉貨要藏篋笥則董伯仁展子虔
鄭法士楊子華孫尚子閻立本吳道玄屏風一片值
金二萬次者售一萬五千自隋以前多畫屏風未知有畫郭故以屏風爲準也
其楊契丹田僧亮鄭法輪乙僧閻立德一屏值金一
萬且舉俗問諳悉者推此而言可見流品四部稿

畫家鑒賞具偽雜說

高子曰米元章云好事家與鑒賞家自是兩等家多
資蓄貪名好勝遇物收置不過聽聲此謂好事若賞
鑒家天資高明多閱博錄或自能畫或深知畫意每
得一圖終日寶玩如對古人聲色之奉不能奪也名
曰真實然看畫之法須着眼圓活勿偏已見必細玩
古人命筆立意委曲妙處不令潦草涉畧論山有起
伏轉換木有隱顯源流林木求其深邃蒼鬱而深淺
分明人物觀其觀面凝眸而顧盼相屬四時之景要
分朝暮陰晴烟雲動蕩花鳥之態須觀歆風含露宿

食飛鳴次及牛馬昆蟲魚龍水族無一不取神氣生動天趣渙然筆墨之外斯不失爲真賞若專以形似取之則市街貼壁賣畫儘有克肖人物花草猫狗之圖何取於古且古人之畫豈特不可以形似物趣求也當無筆跡留滯方見天趣如書之藏鋒始妙松雪詩云石如飛白木如籀寫竹應須八法通正謂是也且好畫不宜多裱裱多失神亦不可洗更不可剪去破碎邊條當細細補足令人寶惜古畫豈特寶若金玉卽如宋人去此不遠畫之在世流傳便少無論唐時五代藏畫之家當自檢點不恤勤煩乃收藏至要

畫之失傳其病有五古畫年遠紙絹已脆不時舒卷
畧少局促卽便折損破碎無救此失傳之一童僕不
識收捲有法卽以兩手甲抓畫捲起不顧邊齊以軸
榦着力緊收內中絹素碎裂此失傳之二或遭屋漏
水濕鼠啗猫溺梅雨黴白不善揩抹卽以麈布擦摩
逐片破落此失傳之三或出示俗人不知看法卽以
手托畫背起就眼觀絹素隨折或挂畫忽慢以致墮
地折裂再莫可補雖貼襯何益此失傳之四或遭兵
火水溺歲苦流移此失傳之五有等敗落子孫無識
婦人不識寶藏堆積朽腐或兒女痴頑用筆塗寫或

燈下看玩以致油污透骨或偶墮燭燒損或挂當風
狂起吹斷刮裂甚矣古畫難存類此種種古人名畫
更少對軸若高尚士夫之畫適興偶作天趣生動人
即寶傳何能有對若高齋精舍豈容四軸張挂即對
軸亦少雅致世以無名人畫卽填某人款字深可笑
也畫院進呈卷軸皆有名人家俱不落款何必見牛
指戴見馬指韓又豈如格古論云無名人畫多有佳
者若云無名決無好畫無名款者皆御府畫也古有
善畫花草者多不落墨以色點染自有一種精神生
意又若粉本卽舊人畫稿草草不經意處乃其天機

偶發生意勃然落筆趣成多有神妙當寶藏之唐人
紙則硬黃短簾絹則絲麤而厚有搗熟者有四尺濶
者宋絹則光細若紙揩摩如玉夾則如常更有濶五
六尺者名曰獨梭紙用鵠白澄心堂居多宋畫迄今
其絲性消滅更受糊多無復堅韌以指微跑則絹絲
如灰堆起表裏一色若今時絹素以藥水染舊無論
指跑絲絲露白即刀刮亦不成灰此古今絹素之辨
似不容僞又如元絹有獨梭者與宋相似有宓家機
絹皆妙古畫落墨着色深入絹素礬染既多精采迥
異其花草紅若初暘綠如碧瑱粉則膩滑如玉黑則

點墨如漆僞者雖極力模擬而諸色間有相似惟紅
不可及且求其入絹深厚則不能矣神采索然又如
古人之畫愈玩愈佳筆法圓熟用意精到以人趣倣
模物趣落筆不凡而天趣發越今人之畫人趣先無
而物趣牽合落筆粗庸入眼不堪玩賞何用僞爲宋
人臨摹唐朝五代畫片神采如出一手秘府多寶藏
之今人臨畫惟求影響多用已意隨手苟簡雖極精
工先乏天趣妙者亦板近如吳中莫樂泉臨畫亦稱
當代一絕

臨者謂以元本置几上於傍設絹素像其

筆而作之謬工決不能如此則以絹加畫上摹臨之

墨稍濃則透汚元本頓失精神米元章就人借名畫輒模本以還取其元本人莫能辨然此人定非明鑒國朝名家可宋可元者亦不乏人高品如文衡山沈石田陳白陽唐伯虎文汶水王仲山錢叔寶文伯仁顧林亭孫雪居沈青門風神俊逸落筆脫塵或隸或行各有天趣元之二趙王黃可與並美如戴文進工山水人物神像雅得宋人三昧其臨摹倣效宋人名畫種種逼真其生紙着色開染草草效黃子久王叔明等畫較勝二家如商喜李在周東村仇十洲山水人物之妙上軼宋人劉范諸輩又如邊景昭呂廷振

林以善張秋江沈士容王牧之陳憲章俞江村周少
谷輦花鳥竹石亦得宋之徐黃家法他如謝廷循上
官伯達金文鼎金汝清姚公綬王孟端夏仲昭王舜
耕陳大章許尚文吳偉蘇致中葉原靜謝時臣朱子
朗朱鹿門夏葵夏芷石銳倪端諸輩皆我 明一代
妙品士夫畫家各得其趣若鄭顛仙張復陽鍾欽禮
蔣三松張平山汪海雲皆畫家邪學徒逞狂態者也
俱無足取

賞鑒收藏畫幅

高子曰收蓄畫片須看絹素紙地完整不破清白如

新照無貼襯此爲上品面看完整貼襯條多畫神不失此爲中品若破碎零落片片湊成雜綴新絹以色旋補雖爲名畫亦不入格此下品也完整中價之低昂又以山水爲上人物小者次之花鳥竹石又次之走獸蟲魚又其下也冊葉卷子同一論法又如神佛圖像其品不同如宋元并我朝畫佛像名家多就山水樹石中或坐或行或倚石凭樹畫法不板烟雲流潤神氣儼臨爲上品也其他三尊並列鬼從猗猗或登寶座諸神衛護者止可爲侍奉香火非流傳品也又如假造佛像畫片以絹搗熟以香烟瀝并灶烟

屋梁挂塵煎汁染絹其色雖舊或黃或淡黑可愚隸家孰知古絹一種傳玩舊色嗅之異香可掬豈人僞可到古絹碎裂儼狀魚口橫聯數絲再無直裂今之僞者不橫即直乃以刀刮指甲劃開絲縷堅韌不斷觸目卽辨藏畫之法以杉板作匣匣內切勿油漆糊紙反惹黴濕又當常近人氣或置透風空閣去地丈餘一遇五月八月之先將畫幅幅展玩微見風日收起入匣用紙封口勿令通氣過此二候方開可免黴白或于閣中設床床下收新出窰炭實之乃置畫于床上永不黴壞不必設火其炭至秋供燒明年復換

新炭

床切不可卧者病瘡屢有驗也蓋火氣所燥故耳

古畫張挂多則三

五日一換久則恐爲風濕侵損質地又不可捲緊恐傷絹地單條短軸作橫面開關門扇匣子畫直放入軸頂貼籤細開某畫甚便取觀畫軸用檀木甚妙能辟濕氣又辟蝨且開匣有香而無糊氣

張彥遠云有收藏而不能鑒識能鑒識而不善閱翫能閱翫而不能裝褫能裝褫而無銓次皆病也

法書繪事代不乏人品之高下俱有完譜愚謂真跡罕存衆評罔驗且篇帙浩瀚難以全收但世之論書則稱鍾張羲獻論畫則曰顧陸張吳世皆祖

述宜詳錄之故集諸君遺唾少滋談者燥吻若曰
汎採博搜非余所能也

十三卷終

燕閒四適卷之十四

畫

畫學總論

或問圖畫之作不知始於何代書曰以五彩彰施於五色漢書又曰唐虞畫象而民不犯然則自上古已有之矣八卦之畫河圖洛書之出與夫鐘鼎科斗黼黻章物其畫之原乎與六書相終始與六籍爲等倫大哉畫之爲物也廣大悉備以天地爲骨法以風雲爲氣韻以造物爲筆墨以日月爲神彩以雨露爲榮絢以四時爲生意以海岳爲運用以宇宙爲襟度斯

畫家不傳之秘也孰可得而識之孰可得而學之不可得而學之孰可得而至之大哉畫之爲物也奧矣畫有六法三品一曰氣韻生動二曰骨法用筆三曰應物寫形四曰隨類傳彩五曰經營位置六曰傳摹移寫六法精論萬古不移自骨法用筆以下五法可學而能如其氣韻必在生知固不可以巧密得復不可以歲月到默契神會不期然而然也

三品詳見前

卷首謂神妙能三品也

畫有三病三病者皆係用筆

一曰板二曰刻三曰結板者腕弱筆癡全虧取與物狀平褊不能圓渾也刻者運筆中疑心手相戾勾畫

之際至生圭角也結者欲行不行當散不散似物凝
礙不能流暢也畫有八戒一戒爲俗二戒濁滯三戒
薄弱四戒枯澹五戒雕琢六戒濃亂七戒偏枯八戒
朽敗畫有十貴一貴精堅二貴莊大三貴雄壯四貴
俊雅五貴古澹六貴清潤七貴簡嚴九貴豪放十貴
富麗畫有六要氣韻兼力一要也格制俱老二要也
變異合理三要也彩繪有澤四要也去來自然五要
也師學舍短六要也畫有六長爲國求筆一也僻澁
求才二也細巧求力三也狂恠求理四也無墨求染
五也平畫求長六也旣明六要又審六長自然知悟

矣畫有十二忌一曰布置拍塞凡畫山水必先置絹素於明淨之室伺神閑意定然後入思小幅巨軸隨意經營若障過數幅壁過十丈先以竹竿引炭朽布山溪樹石樓閣人物大小高低一一位置然後立於數十步之外詳審諦觀自見其可却將澹墨約定謂之小落筆然後肆意揮灑無不得宜宋元諸君意在筆先之謂也亦須上下空濶四傍疎通庶幾瀟灑若充塞滿幅便不風致此第一事也二曰遠近不分作山水先要分遠近使高低大小得宜古人雖云丈山尺樹寸馬豆人此特約略耳若拘此說假如一尺之

山當作幾大人物爲是蓋近則坡石樹木當大屋宇
人物稱之遠則峯巒樹木當小屋宇人物稱之極遠
不可作人物用墨則遠澹近濃愈遠愈淡不易之論
也三曰山無氣脉畫山於一幅之中先作一山爲主
分布起伏餘山皆氣脉連接形勢映帶如山頂層疊
下必數重腳方盛得住凡多山頂而無腳者大謬也
此全景之大義也若夫透角不在此限四曰水無源
流泉必於山峽中流出頂上有山數重則其源高遠
平溪小澗必見水口寒灘淺瀨必見跳波乃是活水
也間有畫一摺山便畫一派泉如架上懸巾絕爲可

笑五曰境無夷險古人布境不一有峯律者有平遠者有縈迴者有空濶者有層疊者或多林木亭館或多人物船舫每遇一圖必立一意若大障巨軸悉當如之六曰路無出入山水應接遠近全在徑路分明或林下透見水源復出或巨石遮斷而林麓半露或隱坡以人物點之或近屋宇以竹木藏之度有不盡之景七曰石止一面名家畫石皴法不一當各隨所學一家爲法須要有頂有腳分稜面爲佳八曰樹少四枝前代畫樹有法大樹生厓壁者多纏錯生坡隴者多高直干漢多頂近水多根枝幹不可上分左右

源官間作正背葉有單筆雙筆更分榮瘁乃按四時
九曰人物偃僂山水人物各有家數描畫眉目分明
點鑿筆力蒼古必皆衣冠軒昂意態閑雅古人所作
可法切不可可以行者望者負荷者鞭策者一例作偃
僂之狀則僞甚矣此狂縱之習可不慎歟十曰樓閣
錯雜界畫雖未斜然重樓疊閣方寸之間而向背分
明顧盼拱接而不雜乎繩墨此爲最難或論江村山
塢間作屋宇者可隨處立向雖不用尺其制一以界
畫之法爲之十一曰滃淡失宜下墨不論水墨設色
金碧卽以墨瀋滃淡須知淺深得宜如晴景空明雨

夜昏濛雪景稍明不可與霧烟嵐氣相似青山白雲
止當於夏秋之景爲之十二曰點染無法謂設色金
碧各有重輕輕者山用螺青樹不用合綠染爲人物
必用粉襯金碧着色則下筆之時其石便帶皴法當
留白面却以螺青合綠染之後再加以石青石綠逐
摺染之間有用石青石綠皴者樹葉多夾筆則以合
綠染再以石青石綠綴之金泥則當於石脚沙嘴霞
彩用之此一家只宜朝暮及晴景乃照曜陸離而明
艷如此也人物樓閣雖用粉襯亦須清潤除紅葉外
不可妄用朱金丹青之屬方是家數如唐李將軍父

子宋董源王晉卿趙大年諸家可法日本國畫家見此病前人已曾議之不可不謹用筆之法使筆不可反爲筆使用墨不可反爲墨用筆墨人之淺近事二者且不知所以操縱焉得臻於妙絕哉此亦非難近取諸書法正類此故說者謂王右軍喜鵝意在取其轉項如人之執筆轉腕以結字此正與論畫用筆同故世之人多謂善畫者往往善書由其轉腕用筆之不滯也山水中用筆法謂之筋骨有筆有墨之分用描處糊突謂之有墨不用水筆寫法謂之有筆此畫家緊要處山水樹石皆用此論硯必須端石歛石或

用甕片用時滌去宿垢墨用精品水用新汲筆用尖者圓者麓者細者如針者如刷者運墨有時而用淡墨濃墨焦墨用宿墨用退墨用厨中埃墨有時而取青黛雜墨水不一而足則不一而得用淡墨六七加而成深雖在生紙墨色亦以滋潤而不枯燥李成惜墨如金是也用濃墨焦墨欲取其垠界非濃與焦則松稜石角不能瞭然然後用清墨水重疊過之卽墨色分明常如霧露中出也淡墨重疊旋旋而取之謂之幹澹以銳筆橫卧惹而取之謂之皴擦水墨丹三而淋之謂之渲以水墨滾回而澤之謂之刷以筆頭

直往指之謂之粹以筆頭特下而指之謂之濯以筆
端而注之謂之點點施於人物亦施於木葉以筆引
而去之謂之畫畫施於樓閣亦施於松針雪色用濃
淡作但墨之色不一而足亦不一而得染就烟色就
纈素本色縈拂以澹水而痕之不可見筆墨跡風色
用黃土或埃墨而得之土色用淡墨埃墨而得之石
色用青黛墨而淺深取之瀑用纈素本色用焦墨作
其旁以得之用筆用墨之法最不可輕易湏志向已
定心手相應持之以謹密濟之以圓活濃淡不爽輕
重得宜如庖丁之牛迎刃而解如扁鵲之醫視見藏

府所謂深造以道左右逢源者也論四景之不同春
天要淡多作春烟橫截樹林地色嫩綠石青作近山
樹葉稀少葉嫩色綠柳要輕拂嫩綠枝條相間桃杏
花開車騎遊人挑酒携琴而翫賞鶯燕飛空鶩鳬浴
水夏要天氣晴明地色深綠林木陰森樹葉稠密柳
葉垂陰拂草草木叢雜茂盛水深青綠之色石老黑
青之色樹下多作水閣涼亭船中多張布幙浮遊逸
人高士揮羽扇於水邊或披襟於大厦寫瀑布要三
摺勢出於深谷林樹之間秋景天氣清湛地色枯黃
樹葉凋稀青綠者少紅黃者多更見秋風之勢水色

清明品多赤色坡脚多黃黃葉落地水濱蘆葦枯折
山中白雲山岫三折寒泉於山凹之間冬天作雪景
天頭黯淡圖墨色以爲陰雲借絹地而成白雪萬木
枯瘁唯長松獨擎但凡雪壓之勢皆用濃墨畫描以
淡墨染成陰一應松石竹木屋宇山頭皆當積雪以
成高低人物幅巾裹頭似窮身寒冷之勢多是簑笠
網棹或沽酒買魚歸庄或衲子頂包還寺孤舟獨釣
於寒江遠山要白天色用淡墨搭之雪天加深搭天
頭之法用螺青微稀從上澹下漸漸添水漸淡無蹤
影爲妙春天色澹螺青淡向下夏天色澹澹螺青淡

向下多留白絹秋天色青螺青淡向下冬天色澹螺青加墨汁向下陰天雨天帶青黑色風色微澹月夜碧青色螺青加三青陰夜墨加螺青秋夜月天白雲中顯出碧青天現出金黃明月雷天起用墨夜雪濃墨日間景微微放澹凡搭天頭地色筆當教濕急急掃去則淡無痕搭地色法用微稀螺青加滕黃神佛地色微微黃色春草地色黃苦綠下頭上頭微澹夏草地色土黃土硃加墨泊染冬天地色黑墨加土黃泊染論雲則有十二等第一要擁起勢如飛動著色者雲頭色要現出其雲脚湏要澹無蹤影爲妙馬遠

夏圭用秃筆澹描指甲雲用淡苔綠逐染青綠山水
澹墨細描白雲或粉染出或粉細絲省高彥敬米元
暉山水上積染出懵懂雲借絹地以成雲也凡水亦
須知春綠夏碧秋青冬黑之法寫畫之所須欲冬煥
夏涼宏堂邃宇淨几明窓筆墨精良神閒意豁方可
臨池故老杜詩云五日畫一水十日畫一石能事不
受相促逼王宰始肯留真蹟斯言當矣

畫題

郭熙

作畫先命題爲上品曾次寬闊自然合古人意趣無
題便不成畫更要記春夏秋冬各有初終曉暮品意

物色便當分解况其間各有趣哉其他不必拘四時
如經史諸子中故事又各從時所宜者爲可如春有
早春曉景早春晚景早春雪景早春雨景早春殘雪
早春雨霽早春雪霽早春煙雨早春寒雲早春煙靄
春雲欲雨春風欲雨斜風細雨春山明麗滿崖春溜
春雲出谷春雲白雀非謂如白雀形也謂如飛雀之翻指耳皆春題也
夏有夏山晴霽夏山風雨夏早山行夏山林館夏
山林木恠石夏山松石平遠夏山雨過平遠夏山雨
過濃雲欲雨驟風急雨夏山雨罷雲歸夏雨溪谷濺
瀑夏山煙曉夏山煙晚夏日山居夏雲多奇峰皆夏

題也

秋有初秋雨過平遠秋霽秋山雨霽秋風隔

霽秋雲下隴秋烟出谷秋風欲雨秋風細雨西風驟
雨秋晚烟嵐秋山晚意秋山晚照秋晚平遠遠水澄
清疎林秋晚秋景松石皆秋題也 冬有寒雲欲雪

冬陰密雪冬陰霰雪翔風飄雪山澗小雪廻溪遠雪
雪後山家雪中漁舍艤舟沽酒踏雪遠沽雪溪平遠
風雪平遠絕澗雪松軒醉雪冰榭吟風皆冬題也

曉有春夏秋曉晴曉雨曉雪曉煙嵐春霽朝陽皆

曉景也

晚有春山晚照雨過殘照雪晚殘照疎林

晚照遠水晚晴暮山煙靄僧歸溪寺客到酒家皆晚

題也

松有雙松三松五松六松喬松一望松

皆祝壽用

郭熙嘗作連山一望松為文潞公壽以二尺餘小絹作一老人倚杖巖前一大松下自此後作無數松大

小相亞轉嶺下澗幾千百松一望不斷平昔未嘗如

此布置取公子孫連縣公相之義此外有所謂青松

春松長松皆隨題賦景非可以執一論也 木有恠

木古木老木垂岸恠木垂崖古木

石有恠石松石

恠石蕪雲松者也

林石

林木蕪之

秋江恠石

恠石之在江岸者蓼花蕪葭之屬亦可作

一二遠近映帶

靈岩恠石

恠石之在山岩角者大松蘿亦可作一二映帶

松石平遠

此小景也作平遠于松石旁松石要大平遠要小

松石濺瀑

作濺瀑於松石邊松石要凝重

濺瀑要飛動亦小景也當以大素分別淺深高下

雲有雲橫谷口雲出崑

間白雲出岫輕雲下嶺 煙有煙橫谷口煙生亂山

暮靄平林輕煙引素春山煙嵐秋山煙靄 水有回

溪濺撲雲嶺飛泉雨中瀑布雪中瀑布煙溪瀑布遠

水鳴榔雲溪釣艇 樵有水村漁舍憑高觀耨平沙

落雁溪橋酒家橋梁樵子已上數題不可失度

畫意

世人止知落筆作畫却不知畫非易事莊子謂畫史
解衣盤礴此真得畫家之法須養得胸中寬快意思
悅適如所謂易直子諒油然之心生則人之笑啼情

狀物之尖斜偃蹇自然布列於心中不覺見之於筆
下昔顧愷之必構層樓以爲畫所此真古之達士不
然則志意鬱澁局在一曲如何得寫貌物情發人思
哉如工人斲琴得嶧陽孤桐巧手妙意洞然於中則
樸材在地枝葉未披而雷氏成琴已曉然在目其意
煩體悖拙魯閎鈍之見鉅鑿利刃不知下手之處焉
得焦尾五聲揚音於清風流水哉更如前人言詩是
無形畫畫是無聲詩哲士多談吾人所師古今佳什
有道盡人腹中之事聚出人目前之景不因靜居燕
坐明窓淨几一炷爐香萬慮消沉則幽情真趣豈易

品藻及乎境界已熟心手已應方始縱橫中度左右
逢源世人將率意觸情豈草草便得因記古人清篇
秀句有發於佳思者則雖一聯半語錄之亦可備觀
則古今名筆精思過半矣如女几山頭春雪消路傍
山杏發柔條心期欲去知何日惆悵回車下野橋
羊
士諤望女几山獨訪山家歇還涉茅屋斜連隔松葉
主人聞語未開門遶籬野菜飛黃蝶
長孫左輔尋山

家南遊兄弟幾時還知在三湘五嶺間獨立衡門秋

水闊寒鴉飛盡日沉山

賈鞏

釣罷孤舟繫葦梢酒開

新甕鮓開包自從江浙爲漁父二十餘年手不攬無

名氏 舍南舍北皆春水但見群鷗日日來 遠水兼

天淨孤城隱霧深杜工部渡水寒驢雙耳直避風羸

僕一肩高盧雪行到水窮處坐看雲起時王摩詰六

月杖藜來石路午陰多處聽潺潺王介甫數聲離岸

櫓幾點別州山魏野犬眠花影地牛牧雨聲坡李後

村密竹滴殘雨高峰留夕陽夏侯叔簡天遙來雁小

江闊去帆孤姚合雪意未成雲着地秋聲不斷雁連

天錢惟寅溪雲初起日沉閣山雨欲來風滿樓 一

水護田將綠遶兩山排闥送青來 沙岸江村近松

門山寺深 疎簾看雪捲 野寺山邊斜有徑漁家

竹裏半開門 古樹老連石急泉清露沙 雪埋寒

樹短雲壓夜城低 泉聲到池盡山色上樓多 亂

山藏古寺 野水無人渡孤舟盡日橫○竹鎖橋邊

賣酒家人皆向酒家上着工夫惟一善畫者于橋頭

也踏花歸去馬蹄香竹外挂一酒帘書酒字自然見酒家在竹內

調合服飾器用顏色

緋紅用銀朱紫花合 桃紅用銀朱燕支合 肉紅

用粉爲主入燕支合 栢綠用枝條綠入漆綠合

黑綠用漆綠入螺青合 柳綠用枝條綠入槐花合

官綠即枝條綠 鴨綠用枝條綠入高漆合 月下

白用粉入京墨合 鵝黃用粉入槐花合 柳黃用
粉入三綠標并少滕黃合 磚褐用粉入烟合 荊
褐用粉入槐花螺青土黃標合 艾褐用粉入槐花
螺青土黃檀子合 鷹背褐用粉入檀子烟墨土黃
合 銀褐用粉入滕黃合 珠子褐用粉入滕黃燕
支合 藕絲褐用粉入螺青燕支合 露褐用粉入
少土黃檀子合 茶褐用土黃爲主入漆綠烟墨槐
花合 麝香褐用土黃檀子入烟墨合 檀褐用土
黃入紫花合 山谷褐用粉入土黃標合 枯竹褐
用粉土黃入檀子一點合 湖水褐用粉入三綠合

葱白褐用粉入二綠標合 棠梨褐用粉入土黃銀
珠合 秋茶褐用土黃三綠入槐花合 油裏褐用
紫花土黃烟墨合 玉色用粉入高三綠合 鮫色
用粉漆綠標墨入少土黃合 毯子用粉土黃檀子
入墨一點合 藍青用三青入高三綠合 金黃用
槐花入燕支粉合 鴉青用蘇青襯螺青罩 鼠尾
褐用土黃粉入墨合 葡萄褐用粉入三綠紫花合
丁香褐用肉紅爲主入少槐花合 杏子絨用粉螺
青墨入檀子合 毯綾用紫花底紫粉搭花樣 薔
皮用土黃銀珠合 鹿胎用白粉底紫花樣 水獺

檀用粉土黃合 牙笏用粉入一點土黃合 皂韉
用烟墨標 柘木椅用粉檀子土黃烟墨合 金絲
柘同上不入墨 紫袍用三青燕支合

合用顏色細色

頭青二青三青深中青淺中青螺青蘇青二綠三綠
花葉綠枝條綠南綠油綠漆綠黃丹飛丹三朱土朱
銀朱枝紅紫花滕黃槐花削粉石榴顆錦燕支檀子
其檀子用銀朱淺入老墨燕支合

襯絹色式

大紅畫丹或二朱 大綠三綠或淡碌粉 白韶粉

土粉合 大青螺青粉或靛花青粉 嫩鵝黃槐花
淡粉 老黃淡土黃粉 三青淡青粉 二綠淡碌
粉 桃紅淡脂粉 紫淡青粉

礬絹法

好絹用水噴石上槌眼匾然後上幘子礬法春秋膠
礬停夏月膠多礬少冬天礬多膠少着色螺青搗石
上滕黃入墨畫樹其色潤美觀

染紙作畫不用膠法

紙用膠礬作畫殊無士氣否則不可着色聞染法以
皂角搗碎浸清水中一日用沙碓重湯煮一炷香濾

淨調勻刷紙一次挂乾復以明礬泡湯加刷一次挂
乾用以作畫儼若生紙若安藏三二月用更妙拆舊
裱畫卷綿紙作畫甚佳有則宜寶藏

十四卷終

燕閒四適卷之十五

畫

繪石論

登泰華而知石之崔嵬遊衡嵩而識石之秀麗故廣大爲山而成萬仞細微爲石則如一卷踞谷成虎臨池作龍顛墜坑穿枕倚巖窟時洞口而嵯峨出泉心而碑斫有磅礴者有奇峭者凌雲插峯隱霄橫嶂峻削標表汗湯儀丰劃震地以同轉嶠戴天而雄壯默玄雲之暮起赭丹霞之朝上依依識啓母之形亭亭表望夫之狀鼓迎桴而若動帆映舟而似颺此竝流

膏曲潤滴乳危峰鋪英九節連葉千重若乃泗水之
上岐山之側拊之則磬發清音被之則錦開新色苔
蘚剝落雨露淋漓巍巍手掩夏雲之奇靄蒼蒼然谷
秋霄之朗色氤氲綠潤霏霽青凝其形勢欲彌雄其
色勢欲蒼古英輝精密潔瑩明爛丹青孕彩隱起成
文盈尺則內含明月膚寸則外吐浮雲惟大小之所
取任圓方之旣殊石工見而驚駭繪氏覩而歎息欲
圖其石須翫真山細擬其形熟察其理故下筆之際
貴于磊落雄壯蒼硬頑澁稜層凸凹厚薄小大復壓
重深揮毫瀟灑欲分凹深凸澹之形皴拂陰陽之理

點勻高下之法乃爲破墨與妙山乃大物形欲聳拔
勢欲偃蹇軒豁舒暢箕踞礧礧渾厚雄豪精神嚴重
顧盼朝拱上有蓋下有乘前有據後有倚迴旋抱合
掩映出入欲下瞰而若臨視欲上遊而若指麾明此
衆義方入玄微之境矣夫磐石者大石也然石之狀
不一有太湖大黑石卧虎大石鷹座大石馬鞍半大
石獅子大石佛座大石彈窩大石道傍磐陀石鬼面
半大石骷髏半大石雲母石芙蓉山石筆架石牡蠣
小石蚌蛤小石鷺子小石蝦蟇小石士女花竹傍青
黑色靈壁石蘭竹上飛白石蒲竹盆白色羊肝小石

花卉孟白粉點漿腦石上尖下大石筍坡脚亂小石
或層疊而秀潤或崔嵬而巔崒有岩崑嵯峨者有恠
形崩灘者或直插入水而深不可測者或石根浸水
而脚石相輔者崢嶸嶙峋千壑萬狀縱橫放逸其體
無窮形勢多端雖以發明皴法數種亦當深究其源
有直皴擦藤皮皴樹皮皴兩點皴芝藤皴拳頭皴卷
雲皴鑿痕皴有橫皴者有砍深皴者或勾者或連水
皴者有馬牙勾者大劈斧長劈斧一筆一畫各有古
法大劈斧貴濃淡得宜鑿痕皴貴精堅不亂拳頭皴
貴流動飄逸兩點皴芝藤皴不得二者相似貴於潤

澤最忌枯燥形狀千變萬化下筆先看面數既定骨
中然後運之筆下自然面面峻嶒形勢不板要辨三
面或在上或在側皆可爲面臨池之際酌意用之大
石貴凝重小石貴精堅要出自然不可妄生圭角論
方圓之法湏用方多圓少則覺峻嶒突岬董源坡脚
下有碎石乃是建康山勢其石又謂之麻皮皴法畫
坡脚下手之妙先向筆畫邊皴起然後用淡墨破其
深處着色湏要厚重寫小山謂之礬頭山山中有雲
氣此皆金陵山景皴法要滲漱下有沙地可用淡墨
輕掃屈曲爲之再用淡墨破開爲宜畫山之妙有三

遠之說從下相連不斷謂之平遠從近隔開相對謂之潤遠從山外遶景謂之高遠畫石之要必從淡墨下筆則可更可改漸用濃墨方爲得體畫山多作礬頭方得峻嶒入目落筆便見堅重之性皴淡卽生空凸之形故石無十步廣山有千里遙每因素以成雲或借地而爲雪其破墨之功尤爲難也或用藤黃少許入墨自然潤色多則滯毫螺青亦宜但畫一石當逸筆撇脫方有士人風致如或繁數斯入畫工之流故氣韻雖出天成運筆亦須心巧操習不計歲月形勢欲追古人調墨必用新泉臨楮還宜閒靜研窮斯

論揮染方得畫石嘉則

畫樹論

登鷲嶺而知松柏之喬古遊雁宕而識檜杉之蒼藹
是以白鹿貞松青牛文梓東海白木西河枯桑俱可
參閱營中細柳洞口天桃小山叢桂巨壑古椿皆宜
構思方可運筆乃能繪楮暄風吹則葉茂枝柔色綠
而密嚴霜降則葉凋榦勁色蒼而踈故勁如勇士之
弓軟若美人之帶仰則可干青漢俯則能垂碧溪巢
丹鳳於古榦栖玄雀於喬枝或欹卧谷口或半折山
腰茂如金谷園中奇似辟彊苑裏點葉之樹要瀟灑

流動碧影重陰若露浥雨滋之翠在於用筆染墨之間不可形似求也露根之木必拳曲擁腫盤坳反覆如熊踞虎潛之勢凡此非智巧之士出人之資未可以云得其蘊奧也又當景別四時榮枯大小叢實咫尺深重以遠次近必蒼古健硬堅重密疎或質或麗以筆迹求之欲斷復續須意會方得分其輕重本在運筆類於書法貴在適圓摻枝挺幹屈節皴皮細裂多端分數萬狀高低長短暈墨淡濃悉由於筆畫其大樹小樹填空一偃一仰向背濃澹各勿相似紊繁處閒疎處習學純熟自然筆法入神四面俱要有枝

有幹蓋取其圓潤樹在有身畫家謂之紐子須要折
搭得宜樹身各欲有發生又貴偃仰疎密相間方爲
中式有葉樹枝必須軟弱面後皆有仰枝此畫林木
之大要也又筆有四勢筋皮骨肉也筆絕而不斷謂
之筋纏縛隨骨謂之皮筆削堅正而露節謂之骨起
伏圓渾謂之肉最宜骨肉相輔肉多者肥而軟也無
骨者剛亦柔也勁死者無肉也跡斷者無筋也墨大
而質朴者失其氣墨微而怯弱者敗其形停分有勢
不可太長太長者則無勢亂作盤曲者則失其勢剛
硬而不宛轉者虧其生意用筆細微者則怯弱必貴

於虬健老硬方爲得宜形勢甚衆其聳而拔者屈折
俯仰者曲躬若揖者如醉而狂舞者似披髮仗劍者
各狀其異也夫松者大夫之比也爲衆木之長亭亭
盤鬱若怒龍驚虺之威如蟠螭伏虎之勢以狂恠而
成飄逸之形以偃覆而爲躬身之態身要挺秀奇特
勁拔羣林枝須拖鎗拽棒葉必聚散參差皮要如鱗
瘦硬古雅或離披斜拂傾覆溪邊或懸崖峻嶺迥出
雲霄其成材者氣槩剛勁不成材者抱節自屈或多
偃蓋而枝盤者頭垂而腰亞者爲異松也皮老蒼蘚
者枝枯葉少者爲枯松也訣云松下離兄弟乃高低

相亞也松亦多子孫乃絡繹相續也惟幼松者其稍
凌空而聳出其針交結而陰重此爲畫松之義詳矣
夫柏者侯伯之比也訣曰柏無叢生要老逸舒暢空
宜轉紐腫節有紋多枝少葉節熙嵌空皮如繩皴點
葉用雙筆勢若蛟虬身去而復回形古而縱橫乃古
柏之狀惟嫩柏者則葉密枝迸稍軟聳枝也夫檜者
其形柏葉松身其枝肆而盤桓其葉聚散而無定乃
古檜之體也夫梅者身須盤折屈彎之勢條用撐空
貫月之形更要蒼蘚叢雜亦須點擦橫皴乃有風烟
雪月之態老榦亂枝之狀楊柳有彎曲拖腰之勢春

則颺絲夏則垂陰秋多枯枝零丁窈窕赤立柔條梧
桐之身形直而勁葉踈而清稀橫皴二三筆也樹
有萬狀變態不同凡畫其根臨崖者則倒生伏起出
拔於土外狂而迸也平土者以大根深入於土中惟
旁迸小根方宜出土也故生於土者挺直獨峙產於
石者屈曲零丁崖岸豐隆方稱蟠根老榦枯槎槁木
務要罅竇嵌空槐陰柏陰要濃松陰要踈雜樹之陰
濃淡相兼樹株花穎當飛蓬高掃帚之狀亦須參差
踈秀上下不齊瀟灑聚散枝頭四面相顧不可偏向
葉要內外反正不可執一身欲圓硬懸崖之木則藤

蘿可附山畔叢林時間枯枝遠村樹木常含烟霧近
渚桃柳須帶微風雨過處葉翠如滴霜落時葉紅於
花須辨春秋之分宜寫榮瘁之狀春英夏蔭秋毛冬
骨春英者謂葉細花毓樹多綠陰踈密相間夏蔭者
葉密茂盛陰濃如籍秋毛者葉踈而飄零蒼黃間出
冬骨者葉枯枝槁萬木歸根惟蒼松獨秀有葉之木
貴在豐茂而陰鬱至於寒林止務蕭踈而重深分布
而不雜枯梢老槎皆當用其淺墨軟稍之木濃淡相
半和而爲之故得幽韻而氣清林罅不用明白尤宜
烟嵐映帶以雜木取其大綱以濃淡爲相間林木枝

葉却如人衣不可微少少則露骨正如人之衣服單薄形多卑陋威儀頓失使人不敬畏耳若作一樹一石務貴簡雅氣韻高古方成逸品繪樹之要斯論詳悉母俟他求

山水賦

荆浩

凡畫山水意在筆先丈山尺樹寸馬豆人此其法也遠人無目遠樹無枝遠山無皴隱隱如眉遠水無波高與雲齊此其要也山腰雲塞石壁泉塞樓臺樹塞道路人塞石看三面路看岸基此其訣也凡畫山水峻拔者曰峰平夷者曰嶺峭壁者曰崖有穴者曰岫

懸石者曰巖形圓者曰巒兩山夾路者曰窵兩山夾
水者曰澗水注川者曰谷路下平土者曰坡自土而
高者曰坂若能辨別乎此則知山水之彷彿也觀者
先看氣象後辨清濁分賓主之朝揖列羣峰之威儀
多則亂少則慢不多不少要分遠近遠山不得連近
山遠水不得接近水山要迴抱水要縈迴茂林古木
寺觀可安斷岸頽堤小橋可置有路處人行無路處
林木崖絕處古渡山斷處荒村水濶處征帆林密處
店舍懸崖古木根露而藤纏臨流怪石嵌空而水痕
凡作林木遠則疎平近則高密有葉者枝垂無葉者

枝硬松皮似鱗柏皮纏身生於土者修長而勁直長
於石者拳曲而伶仃古木節多而半死寒林扶踈而
蕭森凡畫山水須按四時春景則霧鎖烟籠樹木隱
隱遠山拖藍山色漸青夏景則林木蔽天綠蕪平坡
山陰蒼翠綠水平波倚雲瀑布近水幽亭秋景則水
天一色霞鷺齊飛雁橫烟寒蘆渚沙汀冬景則積地
爲雪水淺沙平凍雲黯淡酒旗孤村客舟倚岸樵者
負薪風雨則不分天地難辨東西行人傘笠漁父蓑
衣有風無雨枝葉斜披有雨無風枝葉下垂雨霽則
雲收天碧薄靄依稀山光淺翠網晒斜暉曉景則千

山欲曙輕霧霏霏朦朧殘月氣象熹微暮景則山啣
落日帆卸江湄路人行急半掩柴扉犬吠疎籬僧投
野寺或烟斜霧橫或遠岫雲歸或秋江晚渡或古塚
斷碑或洞庭春色或瀟湘霧迷如此之類謂之畫題
筆法布置更在臨時山形不得犯重樹頭不得整齊
樹藉山而爲骨山藉樹而爲衣樹不可繁要見山之
秀麗山不可亂要顯樹之光輝若能留意於此者須
心會於玄微

山水訣

李成

凡畫山水先立賓主之位次定遠近之形然後穿鑿

景物擺布高低落筆無令大重重則濁而不清不可太輕輕則燥而不潤烘染過度則不接砢綽絮繁則失神發樹枝左長右短立石勢上重下輕擺布栽植勢使相偎上下雲烟取秀不可太多多則散漫無神左右林麓鋪陳不可太繁繁則迫塞不舒山澗高峻毋使傾危水湏深遠勿教窮涸路湏曲折山要高昂孤城置之邊遠墟市依於山脚雪天不用烟霏雨裏無多遠望山舍仍居隘窄漁翁要在平灘朝晴晃朗暮雨陰昏屋舍不在多間漁釣有時而作藤蔓依纏古木窠叢簇搭山頭高山烟鎖其腰長嶺雲翳其脚

遠水縈紆而來還用雲烟以斷其派恠石巉巖而立
仍須土阜以培其根原野曠蕩相連蒼山依其低淺
石須圓渾鋒芒八面稜層木要義交挺幹四時枯茂
迅風拔木暴雨崩崖淺流輕漾平灘深澗明廻幽徑
山必要高低則地淺林宜疎散密則絮繁重巖切忌
頭齊羣峰布宜高下孤峯遠設野水遙施道路時隱
時顯橋梁或有或無遠懼陰濃近防重濁巔崖恠石
不用頻施峻嶺枯槎也宜少作遙烟遠曙太繁恐失
朝昏密樹稠林斷續防其版刻山原峻險依稀樵徑
猶存崖岸傾危隱若雲林深暗平川雖遠參差皴染

而成流水泉源彷彿還多顛撲布兩路有明有晦起
雙峯陟高陟低霧薄雲爽欲晴烟靄濛濛欲雨喬木
聳直蟠屈者一株兩株亂石疊堆奇恠者三塊兩塊
點樹葉稀疎間密皴石脈以重分輕亭菴不必常施
樓觀仍須間作人物轉顧多般野舍猶防相似氣象
則春光明媚榮華夏木繁陰靄翠秋林搖落蕭疎冬
樹槎牙妥帖樹根屈曲龍爪宛若扒拏石布稜層根
脚還須帶土水不過兩重侵天一道飛泉湧瀑多湍
徹底翻濤巨浪淺瀨平流烟波浩浩雲浪湯湯山無
獨木石不孤單林烟一派便休樹木數株而已

扶疎平野矮巢密布山頭孤烟自遠水邊薄靄驟依
巖脚野橋寂寞遙通竹塢人家古寺蕭條掩映松林
佛塔春水綠而漱澗夏澤漲而彌漫秋潦盡而澄清
寒泉涸而凝沍新流肥滑岸石湏要皴蒼古木槎牙
景物還兼秀媚分清分濁庶幾輕重相兼淳重淳輕
病在偏枯損體山高木小雖幽遠而氣雄木大山低
雖雄豪而勢薄千巖萬壑要低昂聚散而不同疊巘
層巒但起伏崢嶸而各異不迷顛倒回還乃造自然
之妙志遠情歡興高筆雅心潛歲月之久自能探索
與玄解理者何在言詮臨池處可宗模範至論畢矣

幸爲細研

山水論

凡畫山水必神游物象身即煙霞則意度自見真山水之川谷遠望之以取其深近游之以取其淺真山水之巖石遠望之以取其勢近看之以取其質真山水之雲氣四時不同春融冶夏蒼鬱秋踈薄冬黯淡畫見大象而不爲斬刻之形則雲氣之態度活矣真山水之煙嵐四時不同春山澹怡而如笑夏山蒼翠而如滴秋山明淨而如粧冬山慘淡而如睡畫見大意而不爲刻畫之迹則煙嵐之景象正矣真山水之

風雨遠望可得而近者玩習不能究錯縱起止之勢
真山水之陰晴遠望可畫而近者拘狹不能得明晦
隱見之迹山之人物以標道路山之樓觀以標勝暨
山之林木映蔽以分遠近山之溪谷斷續以分深淺
水之津渡橋梁以足人事水之漁艇釣竿以足人意
大山堂堂爲衆山之主所以分布以次岡阜林叢爲
遠近大小之宗主也其象若大君赫然當陽而百辟
奔走朝會無偃仰背却之勢長松亭亭爲衆木之表
所以分布以次藤蘿草木爲振挈依附之師帥也其
勢若君子軒然得時而衆小人爲之役使無憑陵愁

控之態山近看如此遠看如此百數十里看又如此
每遠每異所謂山形步步移也山正面如此背面如
此側面又如此每看每異所謂山形面面看也如此
是一山而兼百數十山之形狀可得不悉乎山春夏
看如此秋冬看如此所謂四時之景不同也山朝暮
看如此陰晴看如此所謂朝暮陰晴之變不同也如
此是一山而兼百數十山之意態可得不究乎春山
煙雲聯綿人欣欣夏山嘉木繁陰人坦坦秋山明淨
搖落人肅肅冬山昏靄翳塞人寂寂看此畫令人生
此意如真在此山中此畫之景外意也見青煙白道

而思行見平川落照而思望見幽人山閣而思居見
巖扃泉石而思遊看此畫令人起此心如將真即其
處此畫之意外妙也

東南之山多秀異天地非爲東南私也東南之地極
下水潦之所歸以漱濯開露之所出故其地薄而水
淺山多奇峰峭壁陡出霄漢之外瀑布千丈飛落雲
霞之表非不如華山垂溜之千丈也如華山者鮮爾
縱有渾厚者亦多出地上而非出地中也西北之山
多渾厚天地非爲西北偏也西北之地極高水源之
所出以岡隴擁腫之所埋故其地厚而水深山多堆

阜盤礴連廻不斷於千里之外介丘有頂迤邐拔萃於四達之野非不如嵩山少室之峭拔也如嵩少者鮮爾縱有峭拔者亦多出地中而非出地上也

嵩山多好溪華山多好峰衡山多好別岫常山多好列岫泰山特好主峰天台武夷廬霍雁蕩峨嵋巫峽天壇王屋林慮武當皆天下名山巨鎮天地寶藏所生仙聖窟宅所隱奇崛神秀莫可窮極而欲奪其造化則莫神於好莫精於勤莫大於飽游飫看歷歷羅列於胷中而目不見絹素手不知筆墨磊磊磕磕杳杳漠漠莫非吾畫此懷素夜聞嘉陵江水聲而草聖

益佳張顛見公孫大娘舞劒器而筆勢益俊者也今
之執筆者所養之不擴大所覽之不淳熟所經之不
衆多所取之不精粹而得紙拂壁水墨遽下不知何
以能掇景於煙霞之表發興於溪山之顛哉後生妄
誤其病可數何謂所養之不擴大近者畫手有仁者
樂山圖作一叟支頤於峰畔智者樂水圖作一叟側
耳於巖前此不擴大之病也蓋仁者樂山宜如白樂
天草堂圖山居之意裕足也智者樂水宜如王摩詰
輞川圖水中之樂饒洽也仁智所樂豈一夫之形狀
可見之哉何謂所覽之不淳熟近世畫手畫峰則不

過三峰五峰水則不過三波五波此不淳熟之病也
蓋畫山高者下者大者小者脊脉向背巔頂朝揖其
體渾然相應則山之美意足矣畫水齊者汨者卷而
飛激者引而舒長者其狀宛然自足則水之富態贍
矣何謂所經之不衆多近世畫手生吳越者寫東南
之聳瘦居咸秦者貌關隴之壯浪學范寬者乏營丘
之秀媚師王維者缺關仝之風骨凡此之類咎在所
經之不衆多也何謂所取之不精粹千里之山不能
畫奇萬里之山不能盡秀太行枕華夏而面目者林
慮泰山占齊魯而勝絕者龍巖一槩畫之版圖何異

凡此之類咎在所取之不精粹也故專於陂陀失之
麓專於幽閑失之碎專於人物失之俗專於樓觀失
之冗專於石則骨露專於土則肉多筆迹不混成謂
之疎疎則無真意墨色不滋潤謂之枯枯則無生意
水不潺湲謂之死水雲不自在謂之凍雲山無明晦
謂之無日影山無隱見謂之無煙靄今山日到處明
不到處晦山因日影之常形也明晦不分焉故曰無
日影今山煙靄到處隱不到處見山因煙靄之常態
也隱見不分焉故曰無煙靄

山大物也其形欲聳拔欲偃蹇欲軒豁欲箕踞欲盤

礪欲渾厚欲雄豪欲精神欲嚴重欲顧盼欲朝揖欲
上有蓋欲下有乘欲前有據欲後有倚欲下瞰而若
臨觀欲上游而若指麾此山之大體也

水活物也其形欲靜深欲柔滑欲汪洋欲廻環欲肥
膩欲噴礪欲激射欲多泉欲遠流欲瀑布挿天欲濺
撲入地欲魚釣怡怡欲草木欣欣挾煙雲而秀媚聯
溪谷而光輝此水之活體也

山以水爲血脉以草木爲毛髮以煙雲爲神彩故山
得水而活得草木而華得煙雲而秀媚水以山爲面
以亭榭爲眉目以漁釣爲精神故水得山而媚得亭

樹而明快得漁釣而擴落此山水之布置也

山無煙雲如春無花草無雲則不秀無水則不媚無道路則不活無林木則不生無深遠則淺無平遠則近無高遠則下

山有高有下高者血脉在下其肩股張開基脚壯厚巖岫岡巒勢相培壙勾連映帶不絕此高山也故如是高山謂之不孤謂之不仆下者血脉在上其巔半落頂領相攀根基龐大堆阜壙腫直下深挿莫測其端此淺山也故如是淺山謂之不薄謂之不泄高山而孤體幹有仆之理淺山而薄神氣有泄之理此山

水之體裁也

山有三遠自山下而仰山巔謂之高遠自山前而窺山後謂之深遠自近山而望遠山謂之平遠無深遠則淺無平遠則近無高遠則下高遠之色清明深遠之色重晦平遠之色有明有晦高遠之勢突兀深遠之意重叠平遠之意冲融而縹渺其人物之在三遠也高遠者明瞭深遠者細碎平遠者冲澹明瞭者不短細碎者不長冲澹者不大此三遠也


山有三大山大於木木大於人山不百數十如木之大則山不大木不百數十如人之大則木不大木之

所以比夫人者先自其葉而人之所以比夫木者先
自其頭木葉若干可以敵人之頭人身若干可以方
比於木則人之大小木之大小山之大小皆中度
山欲高盡出之則不高烟霞鎖其腰則高矣水欲遠
盡出之則不遠揜映斷其派則遠矣山不藏其腰不
惟不高且無秀拔之形何異畫確甬水不斷其灣不
惟不遠且無盤摺之勢何異畫蚯蚓
正面溪山林木盤折委曲鋪設而景不厭其詳所以
足人目之近尋傍邊平遠嶠嶺重疊鈎連縹緲而去
不厭其遠所以極人自之曠望












春江水漲



遠浦帆



牧歸
晚浦





魚翁



十五卷終

